

Saya tak takut pada pengkhianat Umno, kata Najib
Free Malaysia Today
Sept 3, 2016

“Saya tidak takut pada orang yang khianati Umno selepas jadi pemimpin sepanjang 22 tahun. Patutkah saya takut pada orang yang sudah berusia 92 tahun,” katanya.

PEKAN: Perdana Menteri Datuk Seri Najib Razak hari ini menegaskan beliau tidak gentar menghadapi musuh dan tidak akan sesekali berundur daripada perjuangannya, meski pun menerima serangan bertubi-tubi dari dalam dan luar negara.

Beliau berkata perjuangannya dipacu semangat kebersamaan, perpaduan dan sokongan yang diterima daripada semua pihak khususnya Parlimen Pekan, yang menjadi kubu politiknya sejak menyertai bidang itu.

“Berebalkan semangat itu, kita akan bangkit semula. Lawan tetap lawan. Saya tidak takut pada sesiapa, hanya takut pada Allah.

“Saya tidak takut pada orang yang khianati Umno selepas jadi pemimpin sepanjang 22 tahun. Patutkah saya takut pada orang yang sudah berusia 92 tahun? Kita tidak payah cakap banyak tentang orang yang sudah banyak terbabas. Insya-Allah, kita boleh mencapai kemenangan berkat kebersamaan kita,” katanya.

Najib berkata demikian semasa berucap menggulung perbahasan Persidangan Perwakilan Umno Bahagian Pekan di Dewan Konvensyen Sultan Haji Ahmad Shah di sini, hari ini.

Katanya, semangat perjuangan beliau tidak pernah luntur walaupun pernah berhadapan detik hitam pada Pilihan Raya Umum (PRU) ke-10 pada 1999 apabila hanya menang dengan majoriti 241 undi.

“Ramai yang suruh saya pindah ke kawasan lain kerana kata Pekan tidak selamat lagi buat saya. Namun, saya tolak cadangan berpindah sebab saya nekad. Saya bermula di Pekan dan politik saya akan berakhir di Pekan,” katanya.

Sehubungan itu, Najib yang juga ketua Umno Bahagian Pekan meminta 148 cawangan Umno di Pekan berjuang bersamanya bagi memperoleh majoriti melebihi 40,000 undi pada PRU akan datang, sekali gus menjadi jawapan paling utuh kepada mereka yang menyerangnya.

Beliau turut mengingatkan ahli perwakilan supaya sentiasa menjaga akar umbi masing-masing dan tidak bercakaran sesama sendiri selain menyelesaikan masalah dalaman secara bertoleransi.

“Saya kena jaga gelanggang yang lebih luas. Saya perlu ke hulu dan ke hilir. Saya perlu mentadbir isu negara yang semakin hari semakin kompleks termasuk dimensi luar yang lebih luas.

“Janganlah memeningkan kepala saya dan jangan sampai menimbulkan apa-apa yang boleh membawa persepsi negatif tentang bahagian Pekan,” pintanya.

Pada masa sama, Najib yang juga menteri kewangan berjanji akan mencari dana tambahan untuk Bajet 2017 bagi melaksanakan lebih banyak pembangunan di luar bandar dan mengurangkan bebanan masyarakat kampung.

“Kita akan cuba kaedah kreatif untuk tambah peruntukan kerana sedar dengan kesusahan yang terpaksa ditanggung mereka...mereka ini jugalah sanggup hidup mati bersama Umno.

“Jadi, kita mesti jaga orang kampung sebab mereka inilah saban tahun penyokong tegar kita, penyokong berani mati kerana kita, dan tidak pernah menyerah kalah kepada musuh politik...kerana merekalah Umno masih mampu berdiri tegak sehingga hari ini,”katanya.

Sementara itu, Najib yang juga presiden Umno, meminta jentera parti dan Barisan Nasional (BN) di seluruh negara supaya bersiap sedia menghadapi corak gerak kerja baharu untuk memenangi PRU14 nanti.

Katanya, gerak kerja itu akan menggunakan kaedah yang lebih baik, tersusun serta menggunakan teknologi dengan cara yang lebih dinamik.

“Jika ada sesuatu yang membuatkan hasil menjadi lebih baik, kita akan lakukan kerana politik itu bersifat dinamik. Jika kita menggunakan kaedah lama, kita akan tewas...jika menggunakan kaedah baharu, kita akan ke depan dan boleh tewaskan semua musuh,” katanya.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/09/03/saya-tak-takut-pada-pengkhianat-umno-kata-najib/>